



**საქართველოს კონკურენციისა და მომხმარებლის დაცვის სააგენტოსთვის მოთხოვნილი
ინფორმაციის განმეორებით მიუწოდებლობის გამო შპს „ქომუნითი სოფტ
სოლუშენსისთვის“ (ს/ნ: 405543470) ჯარიმის დაკისრების შესახებ**

1. ფაქტობრივი გარემოებები

- 1.1 საქართველოს კონკურენციისა და მომხმარებლის დაცვის სააგენტოს თავმჯდომარის 2025 წლის 10 ნოემბრის N04/1320 და 2026 წლის 20 აპრილის N04/604 ბრძანებების შესაბამისად სააგენტოში მიმდინარეობს საქმის მოკვლევა შპს „ქომუნითი სოფტ სოლუშენსის“ (ს/ნ: 405543470) მიერ „კონკურენციის შესახებ“ საქართველოს კანონის 11³ მუხლის საგარაუდო დარღვევასთან დაკავშირებით;
- 1.2 საქმისთვის არსებითი მნიშვნელობის მქონე გარემოებების დადგენის მიზნით, სააგენტომ 2026 წლის 16 აპრილის N02/2469 წერილით მოპასუხე შპს „ქომუნითი სოფტ სოლუშენსისგან“ გამოითხოვა ინფორმაცია. აღნიშნული წერილი ადრესატს ჩაბარდა 2026 წლის 21 აპრილს. მოპასუხეს სააგენტოს მიერ განსაზღვრულ ვადაში არ წარმოდგენია გამოთხოვილი ინფორმაცია;
- 1.3 2026 წლის 30 აპრილს სააგენტომ იმავე ინფორმაციის გამოთხოვის შესახებ ხელმეორედ გაუგზავნა წერილი (N02/2814) შპს „ქომუნითი სოფტ სოლუშენსის“ (ს/ნ: 405543470). წერილი მხარეს ჩაბარდა 2026 წლის 4 მაისს, თუმცა ინფორმაცია არც ამ შემთხვევაში წარმოდგენილა სააგენტოში;
- 1.4 შესაბამისად, საქართველოს კანონმდებლობით დადგენილი წესით, სააგენტოს თავმჯდომარის 2026 წლის 14 მაისის N04/745 ბრძანებით შპს „ქომუნითი სოფტ სოლუშენსის“ (ს/ნ: 405543470) დაეკისრა ჯარიმა მოთხოვნილი ინფორმაციის მიუწოდებლობის გამო;
- 1.5 აღნიშნული ბრძანების სარეზოლუციო ნაწილის მე-3 პუნქტით, კომპანია შპს „ქომუნითი სოფტ სოლუშენსის“ (ს/ნ: 405543470) დაევალა სააგენტოს მიერ 2026 წლის 16 აპრილის (N02/2469) და 30 აპრილის (N02/2814) წერილებით მოთხოვნილი ინფორმაციის 5 (ხუთი) სამუშაო დღის ვადაში წარმოდგენა;
- 1.6 მოპასუხეს ბრძანება ჯარიმის დაკისრების შესახებ (წერილის რეგ. N02/3312; 15.05.2026) ჩაბარდა 2026 წლის 18 მაისს. ამასთან, დამატებით გაეგზავნა წერილი (N02/3331;



15.05.2026) და განემარტა, რომ სააგენტოსთვის, ზემოთ აღნიშნული ბრძანების შესაბამისად, უნდა წარმოედგინა N02/2469 და N02/2814 წერილებით მოთხოვნილი ინფორმაცია და მიეთითა, რომ ჯარიმის დაკისრება პირს არ ათავისუფლებს სააგენტოსთვის ინფორმაციის მიწოდების ვალდებულებისგან. N02/3331 წერილი მოპასუხეს ჩაბარდა 21 მაისს. შესაბამისად, სააგენტოსთვის ინფორმაციის წარმოდგენის ბოლო ვადა იყო 2026 წლის 29 მაისი.

- 1.7 სააგენტოს ადმინისტრაციული და ფინანსური დეპარტამენტიდან მიღებული შეტყობინების თანახმად, მ/წ 2 ივნისის ჩათვლით პერიოდში, შპს „ქომუნიტი სოფტ სოლუშენსს“ (ს/ნ: 405543470) სააგენტოში რაიმე სახის კორესპონდენცია არ წარმოუდგენია.

2. ნორმატიული რეგულირება

- 2.1 „კონკურენციის შესახებ“ საქართველოს კანონის მე-18 მუხლის 1-ელი პუნქტის „ბ“ ქვეპუნქტის და „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-8 მუხლის 1-ელი პუნქტის თანახმად, სააგენტო უფლებამოსილია, ეკონომიკურ აგენტს/მხარეს/დაინტერესებულ მხარეს მოსთხოვოს მისი საქმიანობის ან/და კონკრეტული ოპერაციის შესახებ ნებისმიერი ინფორმაციის/დოკუმენტაციის (მათ შორის, კონფიდენციალური ინფორმაციის) წარდგენა, რომელიც საჭიროა სააგენტოს მიერ შესაბამისი უფლებამოსილების განხორციელებისთვის.
- 2.2 „კონკურენციის შესახებ“ საქართველოს კანონის მე-18 მუხლის 1-ელი პუნქტის „ვ“ ქვეპუნქტის თანახმად, სააგენტო ეკონომიკურ აგენტთან მიმართებით უფლებამოსილია მოთხოვნილი ინფორმაციის განსაზღვრულ ვადაში მიუწოდებლობის შემთხვევაში ეკონომიკურ აგენტს/მხარეს/დაინტერესებულ მხარეს დააკისროს ჯარიმა ამ კანონის 32-ე მუხლის შესაბამისად.
- 2.3 „კონკურენციის შესახებ“ საქართველოს კანონის 32-ე მუხლის 1-ელი პუნქტის, ასევე, „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-11 მუხლის პირველი პუნქტის მიხედვით, სააგენტოს მიერ მოთხოვნილი ინფორმაციის მისთვის მის მიერვე განსაზღვრულ ვადაში მიუწოდებლობის ან სააგენტოსთვის არასწორი ან არასრული ინფორმაციის მიწოდების შემთხვევაში იურიდიულ პირს დაეკისრება ჯარიმა 3 000 ლარის ოდენობით.
- 2.4 „კონკურენციის შესახებ“ საქართველოს კანონის 32-ე მუხლის მეორე პუნქტის, ასევე, „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის №40 ბრძანებით დამტკიცებული წესის მე-11 მუხლის მეორე პუნქტის თანახმად, ჯარიმის დაკისრების მიუხედავად,

სააგენტოს მიერ ხელახლა განსაზღვრულ ვადაში ინფორმაციის მიუწოდებლობის შემთხვევაში, იურიდიულ პირს დაეკისრება ჯარიმა ხუთი ათასი ლარის ოდენობით.

- 2.5 „კონკურენციის შესახებ“ საქართველოს კანონის 32-ე მუხლის მე-3 პუნქტის მიხედვით, ჯარიმის დაკისრება პირს არ ათავისუფლებს სააგენტოსთვის ინფორმაციის მიწოდების ვალდებულებისგან.

3. სამოტივაციო ნაწილი

- 3.1 შპს „ქომუნიტი სოფტ სოლუშენს“ (ს/ნ: 405543470) 2026 წლის 15 მაისის N02/3312 და N02/3331 წერილების პასუხად არ წარმოუდგენია არავითარი ინფორმაცია/დოკუმენტაცია, არ მოუთხოვა ინფორმაციის წარმოდგენის ვადის გაგრძელება და არ შეუტყობინებია სააგენტოსთვის ინფორმაციის მიუწოდებლობის რაიმე შესაძლო საპატიო მიზეზის/მიზეზების არსებობის თაობაზე.

- 3.2 სააგენტო აღნიშნავს, რომ ინფორმაცია გამოთხოვილია „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-8 მუხლის 1-ელი პუნქტის საფუძველზე, რომლის თანახმადაც სააგენტო უფლებამოსილია ეკონომიკურ აგენტს/მხარეს/დაინტერესებულ მხარეს მოსთხოვოს ნებისმიერი დოკუმენტი/ინფორმაცია (მათ შორის, კონფიდენციალური), რომელიც საჭიროა სააგენტოს მიერ შესაბამისი უფლებამოსილების განხორციელების პროცესში და ხელს შეუწყობს საქმისათვის მნიშვნელოვანი გარემოებების დადგენას. აღსანიშნავია, რომ სააგენტოს 2026 წლის 16 აპრილის (N02/2469) და 30 აპრილის (N02/2814) წერილებში მითითებულია ყველა ის მონაცემი, რომელთა მითითებაც მოთხოვნილია „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-8 მუხლის მეორე პუნქტის საფუძველზე.

- 3.3 შპს „ქომუნიტი სოფტ სოლუშენსი“ (ს/ნ: 405543470) ვალდებული იყო წარმოედგინა სააგენტოსთვის საქმისთვის არსებითი მნიშვნელობის მქონე გარემოებების დადგენა/დაზუსტებისათვის საჭირო და სააგენტოს შესაბამისი წერილებით მოთხოვნილი ინფორმაცია.

- 3.4 სახეზე არ არის „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-10 მუხლის მე-2 პუნქტით გათვალისწინებული მხარის დასაბუთებული განცხადება, მოთხოვნილი დოკუმენტის/ინფორმაციის არქონის შესახებ.

- 3.5 ყოველივე ზემოთ აღნიშნულიდან გამომდინარე, „კონკურენციის შესახებ“ საქართველოს კანონის 32-ე მუხლის მეორე პუნქტის, აგრეთვე, „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს

თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-11 მუხლის მეორე პუნქტის თანახმად, ჯარიმის დაკისრების მიუხედავად, სააგენტოსთვის ინფორმაციის მის მიერვე განსაზღვრულ ვადაში მიუწოდებლობის შემთხვევაში იურიდიულ პირს დაეკისრება ჯარიმა 5 000 ლარის ოდენობით.

სარეზოლუციო ნაწილი

„კონკურენციის შესახებ“ საქართველოს კანონის მე-17¹ მუხლის მე-4 პუნქტის, 32-ე მუხლის მე-2 და მე-3 პუნქტების, ასევე, „საჯარო სამართლის იურიდიული პირის - საქართველოს კონკურენციისა და მომხმარებლის დაცვის სააგენტოს დებულების დამტკიცების შესახებ“ საქართველოს მთავრობის 2014 წლის 14 აპრილის №288 დადგენილებით დამტკიცებული დებულების მე-4 მუხლის მე-4 პუნქტის „ე“ ქვეპუნქტის შესაბამისად,

სააგენტომ დაადგინა:

1. დადასტურდეს შპს „ქომუნითი სოფტ სოლუშენსის“ (ს/ნ: 405543470) მხრიდან სააგენტოს მიერ გამოთხოვილი ინფორმაციის/დოკუმენტაციის განმეორებით მიუწოდებლობის ფაქტი;
2. „კონკურენციის შესახებ“ საქართველოს კანონის 32-ე მუხლის მე-2 პუნქტის შესაბამისად, შპს „ქომუნითი სოფტ სოლუშენსის“ (ს/ნ: 405543470) დაეკისროს ჯარიმა 5 000 (ხუთი ათასი) ლარის ოდენობით;
3. ბრძანება მისი მიღებისთანავე გადაეგზავნოს კომპანია შპს „ქომუნითი სოფტ სოლუშენსის“ (ს/ნ: 405543470);
4. ბრძანება მისი ხელმოწერიდან 10 (ათი) სამუშაო დღის ვადაში გამოქვეყნდეს სააგენტოს ოფიციალურ ვებგვერდზე;
5. ბრძანების გასაჩივრება შესაძლებელია საქართველოს კანონმდებლობით დადგენილი წესით წინამდებარე აქტის ოფიციალური წესით გაცნობიდან ერთი თვის ვადაში თბილისის საქალაქო სასამართლოში (მის: ქ. თბილისი, დავით აღმაშენებლის ხეივანი №64);
6. ბრძანება ძალაში შევიდეს ხელმოწერის დღიდან.

ლევან კალანდაძე

თავმჯდომარის მოვალეობის შემსრულებელი